

Qanoq iliornikkut kommuunit akornanni aningaasaqarnikkut innuttaasullu katitagaanerisigut naligiinnerulernissaq anguniarneqassanersoq oqallinnissamik siunnersuut.

(Inatsisartunut ilaasortaq Erik Jensen, Siumut)

Siunnersuummut qujanaq.

Naleraq isumaqarpoq nunatsinni naligiinnginnerujussuaq ilumut atuuttoq annertusiartuinnartorlu. Kisianni aamma isumaqarpugut oqallinneq amigartooq kommunit akornanni naligiinnerulernissaq kisiat eqqartussagaanni. Apeqqut pingaarnerpaaq tassaangilaq allaffissornikkut immikkoortut imminnut naleqqiullugit naligiinnerulersimanersut. Apeqqut pingaarnerpaaq tassaavoq innuttaasut sumi najugaqaralarunilluunniit sullissinermut, periarfissanut ineriartornermullu naligiinnerusunik periarfissaqarnersut.

Siunnersuuteqartup tikkuarpaa pisortat suliffiisa sumi inissisimanagerat inuit sumi najugaqalernissaannut annertuumik pingaaruteqartoq, aamma Naalakkersuisut nassuerutigaaq suliffiit sumi inissinneqarnerat kommunit aningaasarsiornerannut sunniuteqartoq. Tamanna ilumoorpoq. Tamannali ajornartorsiutip ilaminiinnarivaa.

Naleraq isumaqarpoq aaqqissuussaaneq sapiissuseqarfigalugu oqallisigisariaqaripput. Kalaallit Nunaat inoqqortussutsikkut nunaavoq mikisoq. Taamaakkaluartooq aaqqissuussamik pilersitsivugut - siullermik pisortat aningaasaqarnerat qitiusumit aqunneqartoq, taava kommunit akileraarutininik aalajngersaasarput, taava ataatsimut tapiissutit inissinneqartarput, taava naligiissaarinerit kingornalu iluarsiinerit immikkullu ittumik isumagininnerit. Tamanna erseqqinnerulersitsingilaq. Allaffissorneq qaavatigut allaffissornermik ilioraaginnarpoq.

Nalunngikkutsigu kommunit suliassaasa ilarpassui inatsisinut, nunap pingaarnersiuneranut aningaasaqarnermullu tunngassuteqartut, ima aperisariaqarpugut: soq innuttaasut atugarissaarnerat kommunit akileraarutitigut tunngaviisa assigiinngissutaannik taama aalajangiiffigineqartariaqarpa?

Isumaqarpugut aaqqissuussaaneq tamattoq Kalaallit Nunaanni tulluurtuunngitsoq.



Kommunit nukitik innuttaasunut kiffartuussinermut atortariaqarpaat, aningaasaqarniarnernut mikisunut unammillertunut naligiinngitsunut atornagit. Aamma assigiinngissutit ataatsimoortumik tapiissutit nalimmassaanerillu aqcutigalugit ingerlaavartumik aaqqittariaqaraanni, tamanna nammineq takutippaa aaqqissuussineq naammaginartumik atuutinngitsaq.

Naalackersuisut namminneq oqaatigaat kommunit akornanni aningaasaqarnikkut oqimaaqatigiissitsineq allanngortinniarlugu aqcut pisariinnerpaaq tassaasoq ataatsimoortumik tapiissutit iluarsineqarnissaat kiisalu nalimmassaanermut aaqqissuussineq oqallisigineqarnissaa. Tamanna imminermi takussutissaavoq aaqqissuussineq siumungaaq pisarioreersoq. Aalajangiissutissat tassaajuarpata tunngavigisaq equngareersup qaavatigut iluarsiiviginiarsarlugu, taava ajornartorsiummut aallaviusut aaqqinneqaratik malunniutit taamaallat aaqqinninarneqartarput.

Taamaattumik Naleqqamiit isumaqarpugut tunngavissagut itinerusumik aallaaveqartartittariagut.

Kalaallit Nunaanni kommuninut akileraarut taamatsillugu ilumut tulluarnersoq oqallisigisariaqarparput. Oqaluuserissavarput inatsisitigut suliassat pingaarnert taakkualu aningaasalersorneqarnerat nuna tamakkerlugu sullissivimmiit ingerlanneqarnerusariaqarnerut, ersarissumik paasinartumillu pisariaqartitsinerit inatsisitigullu aningaasartuutit tunngavigalugit ataatsimoortumik tapiissuteqarfigineqarlutik. Aamma oqallisigisariaqarparput qanoq ililluta najukkami oqartussaaqataaneq nukittorsarsinnaaneripput, peqatigisaanillu allaffissornikkut oqimaatsumik assigiinngiiaartumillu aaqqissuussinernik pilersitseqqinnata.

Najukkami oqartussaaqataaneq isumaqanngilaq aaqqissuussaaneq atuuttoq ingerlateqqinneqaannassoq. Naleqqamiit isumaqarpugut najukkami oqartussaaqataaneq isumaqartoq innuttaasoq qanilaarnermik, sunniuteqarsinnaanermik sullissivigineqarnermillu misigisimasariaqartoq. Aaqqissuussinerli parlattuanik ungasinnerulersitsippat, allaffissornermik annertusaappat naligiinngissutsimillu pilersitsippat, taava aaqqissuussineq allanngortittariaqarpoq.

Inuusuttut ilinniagartuullu Nuup avataani inuulluataarsinnaanissaat Naleqqamiit aamma kissaatigaarput. Aamma sinerik periarfissanik killilersorneqannginnissaa kissaatigaarput. Kisianni tamanna ilumut angorusukkutsigu, suliffit ataasiakkaat nuunneqarnissaat imaluunniit tapiissutit pillugit iluarsiinissaq kisimik naammannaviangillat. Taava pisortat aaqqissuussaaneerata tamarmiusoq unneqqarissumik oqallisigisariaqarparput.



Naalakkersuisut aqqissuussaaniemik ataatsimiititaliamik innersuussipput kingornalu politikkikkut ataqatigiissaarisooqatigiit innersuussutit pillugit isummeqqullugit. Suliamik ingerlasooqarmat ajunngilaq. Aammali politikkikkut sapiilluta maannakkut oqartariaqarpugut aqqissuussaanerup maanna atuuttup tamakkiisumik attatiinnarnissaa siunertaassanngitsoq. Siunertarmi tassaasariaqarpoq Kalaallit Nunaanni ingerlatsineq pisariinnerusoq, naapertuunnerusoq innuttaasunullu qaninnerusoq pilersissallugu.

Taamaattumik Naleqqamiit kommunit qanoq naligiinnerulersinneqarnissaat pillugu oqallinnissaq kisiat kissaatiginngilarput. Nunap qanoq innuttaasuminut naapertuilluarnerusumik ingerlatsisinnaanersoq pillugu oqallinneq kissaatigaarput.

Qujanaq.